

Matumuuna Inatsisartut suleriaasianni § 33 naapertorlugu aalajangiiffigisassatut siunnersuut una Naalakkersuisunit saqqummiunneqarpoq:

**Kalaallit Nunaanni Eqqartuussisarnermik inatsisip inatsisillu allat assigiinngitsut allanngortinneqarnissaannut inatsisissatut siunnersuummut missingiut pillugu (Politiit pillugit aaqqissuusseqqinnermik, politiinik naammagittaalliuutiginnissinnaanermik aaqqissuusinnermik pilersitsinnermik il.il. naammassinninneq) Namminersorlutik Oqartussat akuersinissaat pillugu Inatsisartut aalajangiiffigisassaattut siunnersuut.** (Isumaginninnermut, Ilaqutariinnut Inatsisinillu Atuutsitsinnermut Naalakkersuisoq)

### **Tunngavilersuineq**

Kalaallit Nunaanni Eqqartuussisarnermik inatsimmut aamma inatsisinut allanut allannguutissatut siunnersuummut missingiut (Politiit pillugit aaqqissuusseqqinnermik, politiinik naammagittaalliorsinnaanermik aaqqissuusinnermik pilersitsinnermik il.il. naammassinninneq) Naalakkersuisut tigusimavaat.

Piffissami nutaajunerusumi Kalaallit Nunaanni politiinut unnerluussisussaataitaasunullu atugassarititaasut pillugit aatsaat taamak annertutigisumik aaqqissuusseqqittoqarnissaa inatsisissatut siunnersuut manna aqqutigalugu siunnersuutigineqarpoq.

Inatsisissatut siunnersuut ilaatigut politiinik unnerluussisussaataitaasunillu aaqqissuusseqqinnissamik siunertaqarpoq, taamaalilluni nunap immikkoortuani politiit naalagaaffimmi nunap immikkoortuani politiit allatulli aaqqissuussaanikkut naligiissinneqassallutik. Tassunga atatillugu inatsisissatut siunnersuutip Danmarkimi allannguutit 2007-imi naammassineqarsimasut pingaarnertut tunngavigai, tassani ilaatigut politiit aaqqissuussaanermikkut agguataarneqarnerat aamma politiit najukkani inuiaqatigiinnut attaveqarnerat allanngortinneqarput.

Aalajangersakkat nutaat, inatsisissatut siunnersuutikkut akuerineqartut, qallunaat eqqartuussisarnermut inatsisaanni aalajangersakkanut naapertuutilernissaat, aamma taamaallaat Kalaallit Nunaanni pissutsinik tunngavilerneqarsinnaappat aallaavimmit taassuminnga saneqqutsisoqarsinnaasoq, taamaalilluni aallaavigineqarput.

Inatsisissatut siunnersuummi immikkoortut pingaarnertut tassaapput:

#### Aqutsisut politiinillu aqutsineq

Ullumikkut Kalaallit Nunaanni Politiit pingaarnertut inatsisunik atuutsitsinnermut ministeeriaqarfiup akisussaaffigai, politiinullu qullersaalluni. Taamaalilluni Kalaallit Nunaanni politimesteri politiit suliarinninnerat pillugu inatsisunik atuutsitsinnermut ministerimit suliaakkiissutinik naalakkerneqarsinnaavoq, aamma politiit pillugit apeqquutit pillugit politimesterip aalajangiussai inatsisunik atuutsitsinnermut ministerimut naammagittaalliuutigineqarsinnaapput.

Taamatut allannguissamik siunnersuuteqarnikkut inatsisinik atuutsitsinermut ministeri politiinut qullersaalluni sulii akisussaasuusaaq, kisianni Justitsministeeriaqarfimmit politiinik qullersatut aqutsineq - nunap immikkoortuani allani politiini pissutsit atuuttut assigalugit - matumani ukiumoortumik direktørimut isumaqatigiissuteqarneq aqqutigalugu - siunissami naalagaaffiup politiivisa pisortaannit ingerlanneqalissasoq tassani piumasaqaataavoq. Politiit sulinerannut malittarisassat nalinginnaasut siunissami aallaaviatigut naalagaaffiup politiivisa pisortaannit aalajangersarneqartalissapput, taannalu Kalaallit Nunaanni politiit suliaannut tunngasunik suliarinninnermut tunngatillugu aalajangiisinaanermut pisinnaatitaassaaq.

Kalaallit Nunaanni Politiit pisortaanerata taaguutaata “politimester”-imiit “politidirektør”-imut allanngortinneqarnissaa siunnersuutip kinguneraattaq, taamaalilluni nunap immikkoortuani 14-ini politiit pisortaanerisa pisortatigoortumik naligiissinneqarnerat erseqqissarneqarpoq.

#### Najukkani inuiaqatigiinnik politiit attaveqarnerat

Najukkani inuiaqatigiinnik politiit attaveqarnerisa patajaallisarneqarnissaat siunertaralugu nunap immikkoortuani siunnersuisoqatigiinnik pilersitsisoqarnissaa Justitsministeeriaqarfimmit siunnersuutigineqarpoq, tassani Kalaallit Nunaanni Politiini aqutsisut qullersaat, Isumaginninnermut Inatsisinillu Atuutsitsinermut Naalakkersuisoq aamma borgmesterit ataatsimoorullugu soqutigisaminnik oqallinnissamut periarfissaqassapput.

Politidirektørip nammineerluni politiit Naalakkersuisunik kommuninillu suleqateqarnerisa aqqissuunneqarnissaanik akisussaaffeqarnerata erseqqissarneqarnissaa siunertaralugu, nunap immikkoortuani siunnersuisoqatigiinni politidirektørip siulittaasunnngornissaa siunnersuutigineqarpoq.

Nunap immikkoortuani siunnersuisoqatigiit politiit Kalaallit Nunaanni sulinerat aqqissuussaanerallu pillugit apeqqutit nalinginnaasut pillugit oqaluuserinnittassasut siunnersuutigineqarpoq. Ingammik suliaqarfiiit politiit kommunillu suliaasanik isumaginninnerannut attuumassuteqartut ataqatigiissinneqarnissaasa qulakkeerneqarnissaannik pisariaqartitsineq oqaluuserissallugu naleqqutissaaq, assersuutigalugu meeqqat inuusuttuaqqallu aarlerinartorsiorlutillu artorsartinneqartunut pillugit suliniutit eqqarsaatigalugit. Taamatuttaaq nunap immikkoortuani siunnersuisoqatigiit najukkani inuiaqatigiinnut immikkut pingaarutillit pillugit apeqqutinik oqaluuserinnittarnissaat siunnersuutigineqarpoq, assersuutigalugu nunap immikkoortuani politiini, ammasarfinni il.il. allannguinerit.

Inatsisissatut siunnersuut malillugu Kalaallit Nunaanni pinerluttarnerit ineriartornerat aamma najukkani pinerlunnissamut pitsaaliuinerit siunnersuisoqatigiinni oqaluuserineqartassapputtaaq, aamma tamanna arlalitsigut politikredsip ilaani assigiinngitsuni pinerlunnermik ajornartorsiuqarnerup pissusia, annertussusia ineriartorneralu pillugit politiit misissueqqissaarnerat tunngavigalugu pisinnaavoq.

Tamatuma saniatigut inatsisissatut siunnersuut malillugu politiit atuuffii pillugit, matumani pinerluttaalisitsiniarneq suliniutit ilanngullugit, nunap immikkoortuani siunnersuisoqatigiit najukkani innuttaasunut paasissutissiissutigineqarnissaat sulissutigisassavaat.

Ukiumi qaangiuttumi politiit suliarisimasaat pillugit politidirektøri nunap immikkoortuani siunnersuisoqatigiinnut allaganngorlugu ukiumoortumik nassuiaasiortassasoq siunnersuutigineqarpoq.

Nunap immikkoortuani siunnersuisoqatigiit politikredsip nalinginnaasumik aaqqissuussaanaera pillugu apequtit pillugit oqaaseqaateqartarsinnaasut, aamma politiit piffissap killeqartup iluani isumannaatsuunissap attatiinnarneqarnissaa, eqqissisimanissaq innarliisoqannginnissaalu pillugit suliassanik aalajangersimasunik aaqqiiviginninnissamik pingaartitsisarnissaat pillugit nunap immikkoortuani siunnersuisoqatigiit politidirektørimut innersuussuteqarsinnaasut siunnersuutigineqarpoq.

#### Unnerluussisussaatitaasut aaqqissuussaanaerat

Soorlu ullumikkut taamaattoq, Kalaallit Nunaanni pisortanit unnerluussisussaatitaasut tassaapput naalagaaffiup eqqartuussissuserisua aamma politimesteri, aamma politimesteri pisortani unnerluussisussaatitaasut naalagaaffiup eqqartuussissuserisuata toqqaannartumik ataaniippoq. Naalagaaffiup eqqartuussissuserisuata politimesterip pinerluttulerinernik suliaanik nakkutilliisussaanaera, aammalu pinerluttulerinermik inatsisitit malillugu malersuineq pillugu politimesterip aalajangiineri pillugit maalaarutinik suliarinnittarnissaa tamatuma kinguneraa.

Taamaalilluni politikredsinit allanut naleqqiullugu statsadvokatit suliarisartagaannik naalagaaffiup eqqartuussissuserisua Kalaallit Nunaanni Politiinut tunngatillugu suliassanik arlalinnik isumagisassaqarpoq. Politikredsinit qullersatut oqartussaanaerup malitsigisaanik suliassanik suliarinninnermi taamaammat statsadvokatit naalagaaffiup eqqartuussissuserisuanut naleqqiullugu annertunerujussuarmik ulluinnarni sullissinermik misilittagaqarput.

Aalajangiussat politikredsini allani aalajangerneqarsimasut pillugit naammagittaalliuuterpasuarnik taamaalillutik statsadvokatit suliaqartarput, soorlu aamma politikredsit inatsisinik tunngaveqarlutik sulineri pillugit nalinginnaasumik nakkutilliineq statsadvokatinut suliarineqartartoq. Taamaammat statsadvokatinut nuussinerup suliat taakku suliarineqarnerannut naleqqiullugu ingerlatsinermut iluaqutaassaaq, soorlu aamma suliassat politikredsinit allanut tunngassuteqartut suliarineqarnerannut naleqqiullugu assigiinnerusumik suleriaaseqarnissaq qulakkeerneqassasoq.

Aammattaq politiit pillugit aaqqissusseqqinnermi naalagaaffiup eqqartuussissuserisuata pingaarnertut apequtinik sulianut tunngasunik nalinginnaasunik aamma eqqartuussisussaatitaasuni allaffissornikkut ineriartortitsinermillu isumaginnittarnissaa piumasqaataammat maluginiarneqassaaq.

Taamaalilluni, statsadvokatit politikredsinit allanut naleqqiullugu suliarisartagaat, kisianni Kalaallit Nunaanni Politiinut naleqqiullugu ullumikkut naalagaaffiup eqqartuussissuserisuanit isumagineqartartut, nunap immikkoortuani ataatsimi statsadvokatinut suliassatut akisussaaffigineqalernissaat taamatut siunnersuuteqarnikkut aallarnerniarneqarpoq.

Tamanna ilutigalugu statsadvokatit Kalaallit Nunaanni pisortani unnerluussisussaatitaasunut ilanngunneqarnissaat siunnersuutigineqarpoq. Statsadvokatit - Danmarkimisut - naalagaaffiup eqqartuussiissuserisuanik pisortaqaassapput pingaarnertullu politiit pisortaannut pisortaassallutik. Taamaalilluni aaqqissussaaneq eqqarsaatigalugu Kalaallit Nunaanni unnerluussisussaatitaasut Danmarkimi unnerluussisussaatitaasunut allanut naligiissinneqalerput. Tamatuma kingorna unnerluussisussaatitaasut tassaalissapput naalagaaffiup eqqartuussissuserisua, statsadvokatit aamma politidirektøri.

Inatsisissatut siunnersuuteqarnikkut maannakkut suleriaatsimik allannguinnissaq siunertarineqanngitsoq maluginiarneqassaaq, ileqqusullu malillugit sulisut politiit ilinniarsimasut aallaavittut eqqartuussisogarfinni unnerluussisusinnaapput.

Suliassat suliareqqitassanngortitsinernut tunngasut Kalaallit Nunaanni politiinit isumagineqartut allanngortinneqannginnissaat siunnersuutigineqarpoq, tassami ilaatigut Kalaallit Nunaanni pissutsinik ilisimasaqarnerup aamma nunap sumiissusaata suliassat tamakku suli Kalaallit Nunaanni politiinit sularineqartarnissaat pissutissaqartimmagu.

#### Politiinik naammagittaalliuutiginnissinnaaneq nutaaq

Politiini sulisut naammagittaalliuutigineqartarnerat aamma politiini sulisut pillugit pinerluttulerinermik suliassanik sularinnittarnernut malittarisassanik naleqqussaasoqarnissaanik naammassinnittoqarnissaa inatsisissatut siunnersuutip ilaani uani siunertarineqarpoq.

Inatsisissatut siunnersuutip peqatigisaanik Kalaallit Nunaanni politiini sulisuusut pillugit naammagittaalliuutinik aamma taakku pillugit pinerluttulerinermi suliassanik sularinnittarneq pillugu inatsit nr. 905, 16. decembari 1998-imeersoq atorunnaarsinneqassaaq.

Inatsisissatut siunnersuut Danmarkimi eqqartuussisarnermik inatsimmi allannguuterpassuarnik 2010-mi naammassineqartunik annertuunik tunngaveqarpoq, siunissamilu Politiit pillugit Naammagittaalliuuteqartarfik Arlaannaannulluunniit Attuumassuteqanngitsoq politiini sulisut sulinerminni pissusilersuutaat (pissusilersuutit pillugit naammagittaalliuutit) aamma politiini sulisut sulitillutik pissutsinik pinerluuteqarnermut tunngassuteqartunik suliaqarsimasinnaanerit pillugu pinerluttoqarsimanermik paasiniaaneq ingerlattassagaat tamatuma kinguneraa.

Kalaallit Nunaanni politiini sulisuusut pillugit naammagittaalliuutinik aamma taakku pillugit pinerluttulerinermi suliassanik sularinnittarneq pillugu inatsit nr. 905, 16. december 1998-imeersumi kapitali 2 aamma 4 malillugit Kalaallit Nunaanni Politimesterip aamma Kalaallit Nunaanni Politiit pillugit Naammagittaalliuuteqartarfiup, politiini sulisuusut sulinerminni pissusilersuutaat (pissusilersuutit pillugit naammagittaalliuutit) pillugit misissuinerit aalajangiisarnerillu pillugit suliassat Politiit pillugit Naammagittaalliuuteqartarfiup Arlaannaannulluunniit Attuumassuteqanngitsup (Politiit pillugit naammagittaalliuuteqarnermut oqartussaasut) tigussagai siunnersuutigineqarpoq.

Inatsisip taaneqartup kapitalii 3 aamma 4 malillugit politimesterip aamma Kalaallit Nunaanni Politiit pillugit Naammagittaalliuuteqartarfiup politiini sulisuusut pillugit pinerluttulerinermi sularisartagaat kiisalu politiit akuliunnerisa kingunerisaanik, imaluunniit politiinit nakkutigineqartillutik inuit toqusimasut, imaluunniit annertuumik ajoqusersimasut pillugit sularisartagaat, Politiit pillugit naammagittaalliuuteqarnermut oqartussaasut aamma tigussavaat. Inatsisissatut siunnersuut malillugu suli unnerluussisussaataasut (siunnersuut malillugu statsadvokatip aamma naalagaaffiup eqqartuussissuserisuata), unnerluussinissamik apeqqut isummerfigisassavaat aamma eqqartuussisoqassappat eqqartuussivimmi unnerluussisutut takkutissallutik.

Politiit pillugit naammagittaalliuuteqarnermut oqartussaasut sulianik sullissinissaani Kalaallit Nunaanni pissutsinik naammattumik ilisimasaqarnissap qulakkeerneqarnissaa siunertaralugu siunnersuisoqatigiinnik, suliassap paasisutissinneqarnissaanut atugassamik ilitsersuutaasumik oqaaseqaateqartartussamik, Kalaallit Nunaanni Politiit pillugit Naammagittaalliuutigineqartut pillugit Siunnersuisoqatigiinnik taaneqartunik pilersitsisoqarnissaa siunnersuutigineqarpoq.

Kiisalu Politiit pillugit naammagittaalliuuteqarnermut oqartussaasut piginnaaneqartinneqarnerisa ataanni politiinut ikiortit inissinneqarnissaat siunnersuutigineqarpoq, tassami politiinut ikiortit politiit sumiiffinni politiit oqartussaasutut sulineranni ikiuuttarmata.

Immikkut isumagisassanngorlugit eqqartuunneqarsimasut inissiisarfimmit ammasumit Nuummi inissiisarfimmi immikkut isumagisarialinnut immikkoortorta qarfirmut nuunneqarnerat

Immikkut isumagisassanngorlugit eqqartuunneqarsimasut, sungiussiartuaartitsinermut atatillugu Kalaallit Nunaanni inissiisarfimmi ammasumi inissinneqartut, inissiisarfimmi ammasumiinnissaat naleqqutinngippat, imaluunniit inissiineq naammattumik isumannaatsuunngippat, Nuummi inissiisarfimmi immikkut isumagisarialinnut immikkoortorta qarfirmut inissinneqarnissaat pillugu inatsisitigut tunngaveqarnissaq inatsisissatut siunnersuummi siunertaavoq.

### **Naalakkersuisut inatsisissatut siunnersuummut oqaaseqaataat**

Kalaallit Nunaat patajaatsunik ingerlalluartunillu aamma ullutsinnut naleqquttunik suliaakkiissutigineqartunillu suliarinnissinnaasunik politeeqarnissaa pingaarutilerujussuuvoq. Taamaammatt aalajangiiffigisassatut siunnersuut manna Inatsisinik Atuutsitsinermi suliaasa qarfirmi pitsaassutsip qaffatsikkiartorneranut alloriarnerit ilagaat.

Tamanna ilutigalugu politiit najukkani inuiaqatigiinnik pitsaanerpaamik attaveqartarnissaat suleqatigiinnittarnissaallu pingaaruteqartorujussuupput, taamaattumillu inatsisissatut siunnersuuteqarnikkut Danmarkimisut Nunap immikkoortuani Siunnersuisoqatigiinnik pilersitsisoqarnissaa Naalakkersuisut pitsaasutut isigaat. Nunap immikkoortuani Siunnersuisoqatigiit politiinut, Naalakkersuisunut Kalaallit Nunaanni borgmesterinut qitiusumik attaveqataassapput, aamma politidirektøri ukiut tamaasa najukkani suleqatigiinnissamik nunap immikkoortuani siunnersuisoqatigiinni oqaluuserineqartussamik tamanullu saqqummiunneqartussamik pilersaarusiortassaaq.

Kiisalu Politiit pillugit Naammagittaalliuuteqartarfik Arlaannaannulluunniit Attuumassuteqanngitsoq politiini sulisuusut sulinerminni pissusilersuutaat pillugit misissuinissanut aalajangiinissanullu aamma politiini sulisut sulinerminni pinerluuteqarsimanerannik paasiniaanissamat piginnaatinneqalermata pingaaruteqarpoq, taamaalilluni arlaannaannulluunniit attuumassuteqanngitsumik misissuinissat qulakkeerreqassallutik.

### **Pisortani aningaasarsiornikkut allaffissornikkullu kingunerisassat**

Soqanngilaq

### **Aningaasaqarnikkut allaffissornikkullu namminersorlutik inuussutisarsiuutilinnut kingunerisassat**

Soqanngilaq.

### **Innuttaasunut aningaasaqarnikkut allaffissornikkullu kingunerisassat**

Soqanngilaq.

### **Tusarniaaneq**

Justitsministeeriaqarfiup tusarniaaneq isumagaa, tusarniaanermilu kalaallit oqartussaasui attuumassuteqartut peqataatinneqarsimapput.

Tusarniaanermut akissutit pillugit tamakkiisumik takussutissiaq oqaaseqaasersugaq suliarineqareerpoq.